

Alemaniarako Parlamentuak bosgarrenez hautatu du Helmut Kohl lehen ministro

Hastear den legegintzaldi hau azkena eta zailena izango da gobernuburuarentzat

Alemaniarako Parlamentuak bosgarrenez hautatu zuen atzo Helmut Kohl herrialdeko gobernuburu. Batasun Kristau-demokratak (CDU), honek kide duen Bavariako Batasun Kristau-sozialak (CSU) eta Alderdi Liberalak (FDP) osatutako koalizio gobernua zuzenduko du beste lau urtez Alemaniako gobernuburuak. Oraingo honetan, ordea, aurreko legegintzaldian baino babes ahulagoaz.

BONN

Kohlek bere hautagaitzaren aldeko 338 boto jaso zituen atzo, lehen ministro izenda zezaten beharrezkoak zituen baino bat gehiago besterik ez. Bundestageko (Parlamentu Federala) bilkuran parte hartu zuten 671 ordezkarien artean 333k bozkatu zuten Kohlen aurka, tartean gobernu koalizioa osatzen duten alderdietako zenbait kidek.

Alemaniarako Errepublika Federaletako gobernuburuaren 16. hautaketak tradizioari eutsi zion horrenbestez: lehen ministro-gaiak Parlamentuaren babesa juxtu-juxtuan lortu zuen, eta horrezaz gain, ez zuen babesten duten alderdietako ordezkari guztien babesik jaso.

Baina alde aurretik zaila ziren berraukeraketa gaitzitu eta lehen ministro karguari beste lau urtez eustea lortu zuen atzo Kohlek, agintean egingo dituen azken lau urteak izango dira, hain zuzen ere. Urriaren 16ko



Behar zituenak baino boto bat gehiago besterik ez zuen lortu Kohlek.

hauteskunde aurretik Kohlek berak iragarri zuen hau azken legegintzaldia izango zuela. Azkena eta zailena seguruenara; izan ere, Kohlek etzi aurkeztuko duen Gobernuaren bi erronka nagusiak ez dira batere makalak: batetik nazioarteko merkatuan Alemaniaren nagusitasunari eustea, eta Alemania bateratuak nazioartean izango duen betekizuna definitzea bestetik. Hori dena, Parlamentuan oso gehien-go ahula duela egin beharko du gainera Kohlen alderdiak, Beheko Ganbaran hamar eskainuren aldea baino ez baitu, eta Goiko Ganbara, Bundesrat, oposizioko Alderdi Sozialde-

mokrataren (SPD) kontrolpean baitago.

Baina, bi Alemanien bateratze prozesua burutu ondoren Kohli duen amets handia betetzea ere, Europaren batasuna lortzea alegia, ez zaio batere erraza gertatuko. Alemaniako gobernuburu bihurtu zenetik helburu hori izan du buruan Kohlek, eta bere jardun politikoari amaiera emateko modu hoberik ez legokeela azpimarratu du behin baino gehiagotan. Baina Europako Batasunaren barruan kohesioa lortzea gero eta zailagoa ikusten da, eta euroeszeptizismoa gora egiten ari da etengabe, baita Alemanian bertan ere.

ERREKORRA GAINDITZEKO BIDEAN

Rudolf Scharping SPDko buruzagiak gogor kritikatu du Kohlen gobernaren egitasmo politikoa, eta honen ezaugarri nagusiak «ahultasuna eta ekiteko gaitasunik ez izatea» direla gehitu. Scharpingek oposiziotik gogor jardungo dutela agindu du gainera.

Dena dela, Kohl Alemaniako Errepublika Federalean agintean urte gehien egin duen gobernuburu bihurtzeko bidean da atzoz geroztik, legegintzaldi berriaren erdialdera gaitzitu baitu Adenauer lehen ministroak —14 urte egin zituen agintean— zuen errekorra.

Italian pentsio murrizketen aurka greba orokorra deitu dute

ERROMA

Silvio Berlusconiaren gobernuak datorren urteko —1995— aurrekontuei begira pentsioak murrizteko duen asmoa dela eta, konfiantza botoa eskatu zion atzo Parlamentuari. Eskaera horren inguruan, pentsioak murriztearen aurka dauden jarrera gogortu egin da eta abenduaren 2an greba orokorra egiteko deia zabaldu zuten atzo Italiako hiru sindikatu indartsuenek.

Zortzi ordukoa izango da abenduaren 2rako deitu duten greba orokorra eta honako hauek dira deialdia egin duten sindikatuak: CGIL (komunista-sozialista jarrerakoak), CSIL (demokristaua) eta UIL (sozialista).

Pentsio murrizketak direla eta, Italiako Gobernuaren aurka egingo den bigarren greba orokorra izango da hau. Aurrekoa joan den urriaren 14an egin zuten baina, hura lau ordukoa izan zen. Greba ezezik, manifestaldi erraldoia ere egin zuten pentsio murrizketak direla eta; joan den larunbatean, hain zuzen, Erroman. Milioi t'erdia lagun inguru bildu zituen larunbateko manifestaldiak, aipatu sindikatuen arabera. Poliziaren arabera berriz, milioi bat eta hirurehun mila lagun inguru bildu zituen.

Oposizioak ere ez du batere gustora hartu Silvio Berlusconiaren gobernuak Parlamentuari konfiantza botoa eskatu izana eta, pentsio murrizketa eragozteko erabili ahal diren bide parlamentario guztiak erabiliko dituztela gaineratu zuten.

Bestalde, Parlamentuari pentsio murrizketen gaineko konfiantza botoa eskatu baino lehen, Kongresuarekin izan zuen bilera Gobernuak. Italiako Gobernuaren aginduz, ustez ustelkeriarekin zerikusia duten eraikitzaileei zigor neurri bat ezarri behar zitzaien; eraikitzen ari diren eraikineko obrak bertan behera uztea, alegia. Neurri horren ondorioz, Italian ugari dira geldituta dauden eraikuntzak. Gauzak horrela, Silvio Berlusconiaren gobernuak neurri hori kentzeko konfiantza botoa eskatu zion atzo Kongresuari eta horrek eman egin dio.

'Gordon' ekaitzak 200 lagun hil ditu Haitin

Joan den asteburuan Karibe eskualdea gogor astindú zuen ekaitzaren ondorioz litekeena da Haitin 200 lagunetik gora hil izana. Jacmel hiritik jasotako berrien arabera, Haitiko hego-ekialdeko herri hartan ehun pertsona hil dira gutxienez, eta kopuru bera aipatu zuten Port-au-Princeko agintariek hiriburuan uholdeek eragindako hildakoei buruz mintzatzerakoan. 'Gordon' ekaitz tropikalaren eraginak Haitin ezezik, Kuban eta Dominikar Errepublikan ere nabaritu dira. Santo Domingoko iturrien arabera, gutxienez hiru lagun hil dira herrialde hartan.

ANITA BACA / AP

